

→ ISU

PEMBALAKAN HARAM JEJAS HABITAT HAIWAN LIAR

Taburan berpulau-pulau di Johor perlu pelaksanaan CFS

● Pelbagai pihak boleh bantu salur maklumat, pulihara habitat hidupan liar

Oleh Mohd Fahmi
Mohd Yusof
mohdfahmi@bh.com.my

Johor Bahru

Taburan kawasan hutan yang berpulau-pulau dan tidak berpusat akibat kegiatan pembalakan, menjadikan kawasan keliaran semula jadi hidupan liar terganggu, selain menjaskan kestabilan ekosistem di negeri itu.

Presiden Persatuan Pencinta Alam Malaysia (MSN), Prof Dr Ahmad Ismail, berkata taburan hutan

yang diperolehnya mendapati kawasan hijau di negeri ini berpulau-pulau dan tidak berada dalam kelompok yang besar.

Katanya, ia menyebabkan kawasan keliaran (laluan) hidupan liar seperti harimau, gajah, tapir, beruang matahari dan seladang tidak mencukupi sehingga mengakibatkan konflik dengan manusia.

"Kajian segera perlu dilaksanakan sebelum terlewat dan pengalaman dengan Badak Sumatera (yang pupus) dan kebimbangan kepususan harimau dan mamalia besar lain perlu dijadikan teladan.

"Sudah sampai masa Johor yang luas, masih banyak kawasan hutan semula jadi dan sumber hidupan liar, menjuarai pemuliharaan alam semula jadi untuk pelancongan, kepelbagaian biologi, pendidikan dan penyelidikan alam semula jadi.

"Pelaksanaan Central Forest Spines (CFS) perlu dibuat untuk kawasan keliaran hidupan liar yang menjadi penyumbang kepada kestabilan ekosistem wilayah selatan,"

katanya kepada BH, semalam.

Sedia maklumat kepelbagaian biologi

Ahmad berkata, pertubuhan bukan kerajaan seperti MNS boleh membantu menyediakan maklumat mengenai kepelbagaian biologi bersama universiti tempatan lain, selain kerjasama agensi lain seperti Perbadanan Taman Negara Johor (PTNJ), Jabatan Perhutanan Semenanjung Malaysia (JPSM) dan PERHILITAN.

"Penebangan hutan sudah diketahui umum memberikan kesan jangka pendek dan panjang, malah semestinya memberikan kesan kepada kepelbagaian biologi negara," katanya.

Mengulas lanjut mengenai kegiatan pembalakan di Mersing, Ahmad berkata semakan segera perlu dibuat bagi memastikan sama ada kawasan terjejas itu adalah termasuk dalam Kawasan Sensitif Kelas Pertama dan tадahan air.

"Keadaan sekarang hutan sema-

kin mengecil, habitat hidupan liar semakin berkurang, konflik manusia dengan hidupan liar bertambah, Johor antara negeri yang tinggi kepelbagaian biologi negara, maka status semua hutan terutama bersempadan dengan Taman Negara Endau-Rompin perlu dilihat semula dengan segera," tambahnya.

Kelmarin, BH mendedahkan sekurang-kurangnya tiga lokasi di Jalan Jemaluang-Mersing dikesan semakin gondol akibat kerja pembalakan dan peta Google juga menunjukkan lokasi pembalakan terbabit berada di kawasan sekitar Hutan Simpan Lenggor dan Gunung Arong.

Kawasan pembalakan membabitkan hutan seluas lebih 30 hektar itu dipercayai dijalankan sejak kira-kira lima tahun lalu.

Mersing daerah ketiga terbesar dari segi keluasan tanah di Johor, iaitu seluas 283,608 hektar dengan jumlah penduduk kira-kira 69,947 orang.



Sudah sampai masa Johor yang luas, masih banyak kawasan hutan semula jadi dan sumber hidupan liar, menjuarai

pemuliharaan alam semula jadi untuk pelancongan, kepelbagaian biologi, pendidikan dan penyelidikan alam semula jadi"

Ahmad Ismail,
Presiden MSN